



滿漢大臣列傳

卷十三

常 青

陳 杰

良 卿

永 慶

覺羅奉寬

常青修佳氏滿洲正藍旗人江西巡撫安圖子乾隆六年由寧良郡王府親軍充三等護衛十年遷頭等護衛十四年擢長史十八年授德州城守尉二十一年授鑲紅旗蒙古副都統調盛京熊岳副都統二十四年調西安副都統二十六年調察哈爾副都統以審辦護軍朋楚克扎布斃妻案遲延未結部議降二級留任三十一年調歸化城副都統三十四年正月將隱匿盜馬賊犯之驍騎校三濟題補佐領部議降二級調用得

旨改爲革職留任尋以失察庫銀被竊部議革任

諭寬免仍註冊十二月回京授正藍旗滿洲副都統三十五年調察哈爾都統三十九年誤拿王啓雲爲山東逆犯王倫黨奉旨嚴飭四十七年授杭州將軍四十九年調福州將軍五十一年六月署閩浙總督七月奏查究泉州府知府鄭一桂供前督

臣富勒渾調任兩廣過泉曾備金葉交富勒渾家人殷士俊餽送

諭曰鄭一桂餽送富勒渾金葉時富勒渾已離閩浙總督之任乃猶如此逢迎餽送則其在任時必有通同交結納賄營私不止鄭一桂一人餽送之事不可不徹底查辦以成信讞此時常青現署總督當以雅德爲戒屬員皆其所轄卽著嚴密訪察從前富勒渾在閩時除鄭一桂之外屬員有無似此案餽送欸蹟卽據實嚴查覆奏毋得少涉瞻循致有不實不盡閏七月奏查出富勒渾家人李世榮需站規

諭欽差大學士公阿桂歸案辦理八月奏諸羅縣捐貢楊光勳與弟監生楊功寬因爭家產啟釁糾黨立會欲圖械鬪洩忿經知縣董啟埏會營訪拿復率衆持械奪回就獲匪犯張烈現據臺灣道永福拏獲首犯楊光勳等並餘犯五十三名飭臬司李永祺前往會辦

諭曰臺地遠隔重洋非內地可比此等匪犯尤屬不可輕縱必須按名拿獲速正刑誅勿使蔓延疏脫方爲妥善十月實授閩

浙總督十二月奏龍溪南靖二縣界之獅頭山有匪徒陳薦糾黨潛匿不時出山搶劫經漳州鎮道督兵役搜捕盡獲之解省嚴究宣法得

旨褒嘉是月彰化縣匪徒林爽文滋事常青奏據署淡防廳程峻等稟報彰化城陷知縣俞峻死之臣飛咨水師提臣黃仕簡領兵由鹿耳門進派副將丁朝雄等帶兵聽海壇鎮總兵郝壯猷調遣由閩安出口至淡水進都司馬元勳領陸路提標兵赴鹿仔港堵禦臣往駐泉州會陸路提臣任承恩居中調度委金門鎮總兵羅英筴赴廈門彈壓

諭曰臺灣地隔重洋民刁俗悍屢次滋事今有彰化縣賊匪林爽文等糾衆騷擾殺害官長攻陷城池尤爲罪大惡極不可不痛加殲戮以示懲創賊匪么麼烏合黃仕簡到彼督率該鎮道盡力堵剿無難立就撲滅但恐餘黨四散竄逸或偷越內渡常青任承恩現駐蚶江一帶著嚴飭沿海口岸地方文武員弁實力巡防最爲緊要常青徐仕曾等總須不動聲色妥協辦理若因外洋遇有此等案件該督撫紛紛調遣跡涉張皇致內地民



人心生疑駭殊有關係該督撫不可不處以鎮定也又奏據偵探守備林登雲稟賊匪已到竹塹地方北路一帶悉被占踞郡城急須保護現在任承恩統兵由鹿耳門繼進

諭曰此等奸民糾衆滋事一經黃仕簡到彼自必望風潰散承恩本不應前往今既已渡臺亦不須拘泥回任常青仍祇須駐筍咄江廈門一帶調度策應此時總以鎮靜內地爲要五十二年正月奏賊陷諸羅經臺灣鎮總兵柴大紀堵剿林爽文係漳州人匪徒率隸漳籍難保無內外勾連情事臣惟豫設機宜倍加嚴重並與漳州毗連之廣東潮州等境移會兩廣督臣防範一面督催渡臺官兵協力進剿

諭曰常青此次所奏派兵勦捕各事宜較前稍有主見略知鎮定但摺內稱逆首林爽文係漳州人其附從之人率皆籍隸漳屬其中難保無內外勾連情事等語此等匪徒糾衆滋事無論何處人民其從賊者卽係夥黨自應按名駢戮若漳泉民人鄉勇果能應募拒賊出力堵禦防守卽係良民自應加以獎賞不應豫存歧視稍露形跡轉致漳民心生惶懼別滋事端又奏鹿

耳門爲臺地咽喉須厚集兵力庶可近護郡城遠赴攻勦現添派督撫二標兵千檄原任閩安協副將徐鼎士帶領又調福寧鎮各營兵千檄遊擊延山帶領由鹿耳門進交黃仕簡調度上以其過於張皇飭之尋

諭曰臺灣奸民林爽文等糾衆滋事一案該督常青於勦捕逆匪一切調度堵禦機宜辦理尙屬鎮靜現在水陸兩提督業經渡臺會勦逆匪自無難立時撲滅惟是海疆重地將來善後事宜均須妥協籌辦常青係初任總督恐未能料理裕如李侍堯著調補閩浙總督常青卽著調補湖廣總督俟李侍堯到閩接印後常青卽來京請訓再行赴任常青奏臺灣守備陳邦光帶領義民由鹿仔港抵漳賊出抵禦邦光擊敗之擒僞帥楊振國等殲賊百餘隨入城護衛受困兵民同回鹿仔港固守並將楊振國解泉聽審報

聞旋奏訊明楊振國等情節解京審辦

諭曰所獲匪犯朕意本欲令其解京今該督於獲犯審明後卽請解京審辦理各事宜皆與朕意適合不意常青竟能如此甚

屬可嘉此時該督惟應督率弁兵悉心調度以期迅速竣事朕必加恩嘉獎更不必以調任縈心稍存疑畏轉於勦捕無益時黃仕簡任承恩先後渡臺分南北兩路進勦常青督飭內地各海口嚴查以防竄逸

諭曰常青於辦理善後事宜自不如李侍堯之諳練而督率搜捕則常青爲優著李侍堯抵閩後卽駐筭蚶江常青卽親自渡臺督同黃仕簡統領官弁將竄入內山賊黨盡數搜捕務盡根株仍不得因追捕賊匪或致擾動生番方爲妥善又

諭曰常青已調任湖廣總督今以欽差前往督辦一切題陞調補若專俟本省總督李侍堯辦理則所統將弁等見常青不能專主或心中以爲卽奮勉出力亦不能卽邀拔擢未免稍生懈怠著傳諭常青現在臺灣將弁被賊戕害多有原缺未補者常青到彼卽應於勦賊弁兵內核其實在出力者官則酌予陞擢兵則拔補千把一面具奏一面知會李侍堯俾有事權以便策勵將士是日柴大紀等奏請添兵

諭曰常青到臺灣後務須察看情形如果必須增添兵力卽一

面具奏一面咨照李侍堯於附近各營再撥二三千名速渡臺灣俾資策應時侍堯奏調粵兵四千一由廈門赴鹿耳門一由蚶江赴鹿仔港

諭曰常青處所有之兵尙未免單薄著傳諭李侍堯如粵兵尙未分路配渡卽檄令全赴鹿耳門直抵臺灣府城俾常青處兵力壯盛足資調遣如業經分路配渡前進著常青於粵兵將抵鹿仔港者亦卽調來合爲一處常青親帶勇往將弁徑赴大里杙賊巢鼓勵弁兵務將首惡林爽文一鼓擒獲其餘賊衆不難撲滅淨盡四月抵臺劾黃仕簡任承恩遷延觀望擁兵自衛郝壯猷守鳳山賊至棄城走請分別治罪

諭逮任承恩撤回黃仕簡宣郝壯猷於法授常青爲將軍旋奏賊攻府城率兵勇擊退

諭曰賊匪竟敢攻犯府城常青親率官兵鄉勇臨陣多有斬獲此時粵東兵丁陸續到彼常青得此自可鼓其精銳迅速進攻所有該道府請發銀十萬兩米十萬石卽著李侍堯速行照數運往以備接濟並著常青就近先行酌量如有多餘兵糈或米



或穀散給貧民務使不致逃散方爲妥協又奏府城外之桶盤棧草店尾柴頭港三處地最衝要偵知賊匪將犯府城豫派遊擊蔡攀龍等帶兵劄營賊連次進撲率兵勇出城殲戮無算賊目莊錫舍悔罪投誠

諭曰此次賊匪有攻犯府城之信常青豫先設法防堵於桶盤棧等衝要地方豫派令遊擊蔡攀龍等各帶兵分劄營盤相機堵剿籌畫調度俱合機宜逮賊匪分路攻犯府城常青率官兵鄉勇迎捕截殺斬獲甚多常青年逾七旬尙能如此勇往督戰朕心深爲嘉獎伊係年老之人宣力海疆無親子在旁侍奉殊堪繫念著伊子刑部筆帖式喜明賞給三等侍衛馳驛前往臺灣省視並將賞給常青之玉搬指等件卽著伊子帶往以示優眷常青感激朕恩益思奮勇迅速剿除賊匪永清海疆朕必格外加恩五月奏林爽文潛回大里杙臣應直攻北路但南路賊黨莊大田等衆不下萬餘若遽統兵北向不惟鳳山等處被擾亦恐乘虛來犯郡城須勦盡南路然後乘勝北趨

上韙之

諭部優敘部議加三級六月奏勦賊南潭殲六百餘投誠之莊錫舍擒僞軍師番婦金娘請解京審辦留錫舍軍營効用

命賞給錫舍守備又奏各路征兵雲集現派副將丁朝雄等守府城統兵往鳳山南路搜勦

諭曰據常青等奏統領官兵起程進勦一摺據稱先往鳳山南路一帶賊人分踞之處堵截圍拏但摺內又稱莊大田等恃衆鳴張仍敢於離城二三十里之外大穆降等處聚集等語賊匪敢於附近府城各處聚衆占踞倘窺伺大兵已出乘虛滋擾雖常青等派有副將丁朝雄等帶領官兵足資堵禦究不免有後顧之虞常青先應將城外賊匪搜捕圍拏將賊首莊大田設法擒獲肅清肘腋方可乘銳前驅尋奏進勦鳳山出城未十里有賊三路兜圍官兵擊退之又連夜糾衆抗拒現在賊勢蔓延前調兵不敷進勦請厚集兵力

命大員前來督辦

上以派大員前往跡涉張望

諭添兵會勦又

諭曰常青本由都統將軍甫經簡授總督更事未多今自到臺灣後一切調度尙能妥協已出意料之外但伊究竟年逾七旬精神未能周到昨奏請派一大員到臺灣督辦軍需其意未必非自揣難以勝任欲朕另簡大臣前往督辦軍務不可不豫爲籌及

命陝甘總督福康安前往督師

諭曰常青現在臺灣督辦軍務其湖廣總督之任雖經舒常署理而常青係正任自有應得廉俸等項但閩省既不支給而湖廣又不便專差齎送該將軍在臺灣一切用度何所仰給著李侍堯將常青應得湖廣總督分例養廉卽在閩省庫內按數給支常青奏賊黨犯府城經丁朝雄等擊退又撲桶盤棧官兵齊赴接應殲賊數十乘勝追捕殺傷甚衆莊大田在南潭遣夥匪千餘焚劫蔦松等處官兵馳勦又鎗斃二百餘現在大營距府城未遠勢將犄角無後顧之虞得

旨嘉獎賞雙眼花翎

命直趨南潭會勦七月奏賊冒雨撲大營復攻桶盤棧官兵禦

之殲百餘

諭曰常青等奏到情形是伊等尙筭營駐守因賊匪乘雨攻擾營盤督兵堵禦殺死賊匪僅一百餘人不及十分之一未能乘機進剿此次添調各兵計粵省先行調撥兵二千及李侍堯挑備兵二千此時均可前抵臺灣此外添調兵丁尙須時日常青等斷無坐待株守之理前曾諭令該將軍等統領侍衛章京將備徑往南潭擒拏賊首莊大田設餘賊奔救即可聚而殲戮該將軍是否卽行派撥直趨南潭若察看情形可以如此辦理業已前往固屬甚善但賊匪出沒無定甚爲狡獪若因常青等統兵前往南潭賊匪卽糾合夥黨繞截後路亦不可不慮該將軍等務須加意防範或派奮勉將弁斷後使我兵首尾相應不致被其抄襲方好常青奏鹽水港笨港均有賊搶占以絕糧餉諸羅勢甚危急添派總兵魏大斌等率師堵禦仍照料郡城南北兩面以及鹿耳門要口

諭曰賊人狡計係因大兵俱在府城諸羅一帶兵勢單弱故作窺伺府城以牽綴官兵使常青等不能遠離該處營盤而其意



實欲斷我糧道攻逼諸羅常青此時竟宜先往北路或於總兵副將內擇其奮勇可恃者酌撥一員令其固守營盤而常青等竟揀選精銳親自帶領直趨北路前至諸羅會同柴大紀并力擒渠搗穴或再分派勁旅將鹽水港屯占賊匪悉力殲除打通糧道此爲上策常青奏賊擾鹽水港等處當派魏大斌等帶兵應援詎南路賊匪聞郡城北面有警糾衆七八千圍大營三面又犯桶盤棧官兵分路奮擊敗之

諭曰南路賊匪將官兵牽綴狡黠顯然是常青等在府城結營株守無益竟當遵照前旨直趨北路會合攻勦爲是時魏大斌勦賊失利派遊擊田藍玉赴援

上以零星派撥無濟於事飭之旋

諭曰本日詢問常青齎摺差弁饒成龍據稱將軍箭營在小南門外十里之桶盤棧地方自五月二十四日以後賊人打仗數次因賊人四路抵禦未能前進賊目莊大田所踞南潭距桶盤棧營盤只有五里等語常青等自駐筴臺灣已經數月其桶盤棧營盤相距南潭不過五里該將軍等早應統領大兵將賊目

莊大田先行勦除乃惟知結營自守似此肘腋之間任其逼處竟不思乘勢攻勦實不可解前以爲南潭離大營尙遠故屢次諭令該將軍等酌留官兵固守營盤親統大軍舍南趨北與柴大紀藍元枚會同進勦此時如尙未啟行該將軍等卽行帶領官兵速將五里外南潭屯聚之莊大田痛加勦洗以清肘腋八月

命福康安爲將軍

諭曰朕特命福康安前往更換常青並非因常青辦理軍務大有貽誤實因常青年逾七旬軍旅之事本非素練恐日久因循不能辦理完結是以特命福康安前往接辦以期迅速竣功福康安未到之前常青接奉此旨不必心懷疑懼轉致遇事茫無主見遇有可進之機仍當督率將弁相機進勦倘此時能將逆首林爽文擒獲固屬甚善卽逆首尙在稽誅而賊目莊大田若能擒獲官兵已操勝勢卽著該將軍由六百里加緊馳奏尋奏南潭賊攻大營派侍衛烏什哈達等擊敗之因雨後路滑收兵旋又督兵由沙崗嵌脚北勢三路進勦南潭沿途砍伐密箐賊

不能藏伏悉出抵禦鎗斃者甚衆三路軍合勦直至南潭燬草藁數百間賊竄因天晚山徑逼仄不便深入

上以莊大田旣在南潭卽應奮力追獲乃以屢遇雨收兵傳旨嚴飭又奏軍中染患暑濕莊大田探知消息仍復屯聚若舍南趨北恐附郡賊夥竊發安業各莊不無惶惑

上以賊人探知軍中染患係常青機事不密之咎又不統兵北向不免蹈黃仕簡覆轍申飭之常青奏督率總兵梁朝桂等勦賊南勢莊多斬獲並奏據新授陸路提督柴大紀咨報諸羅圍急糧餉鉛藥俱罄卽派副將蔡攀龍等領兵救援

諭曰常青若能先將南路賊匪悉力殲除賊目莊大田拏獲固可稍贖前愆否則速統大兵乘其新到銳氣直趨北路前抵諸羅亦尙可補過卽屬常青之福若惟知株守郡城坐視柴大紀被賊圍困致有疎虞則是常青罪上加罪恐不能當此重戾也九月奏大兵赴援諸羅行至三坎店有賊抵拒擊敗之旋據留守郡城之總兵梁朝桂報賊從南潭中洲一帶來犯郡城臣折回夾擊賊稍却旋又四路攔截道梗不能北向

諭曰常青且將南路屯占賊匪勦殺以清後路十月賊犯大營東南率梁朝桂等迎擊轉戰至大河溪邊殲二百餘

諭曰常青在府城駐守雖未能前進但一切調度尙俱妥協又聞知諸羅鹽水港兩處被賊滋擾先後派兵接應且伊在府城亦經屢次與賊打仗是常青雖屬年老尙能料理軍務且福康安到鹿仔港後由北路統兵進勦其南路及府城一帶亦須有大員駐劄督辦應仍令留駐府城督率勦捕十一月奏附近府城賊莊漸次勦盡近日南路民人隨營効力者衆擬廣招義勇數千廓清南路以便往救諸羅

上以常青帶兵南路不如先救柴大紀爲是

諭與福康安會合進攻又奏同江寧將軍永慶等三路進攻在竹篙厝等處殲賊甚衆山猪毛社義民尤趨捷獲礮一生擒賊目張招得

旨嘉獎又奏總兵普吉保已攻開月眉莊等處離諸羅五里飭令與柴大紀并力固守俟福康安到鹿仔港協同掃穴擒渠並分飭弁兵嚴防海口毋使賊搶船遠遁又多備札諭令熟識番

情之諸羅生員劉宗榮等密往大武壠後山給番社通事土目防賊竄匿

上嘉其所辦妥協時福康安統兵渡臺授常青福州將軍留辦善後事宜十二月奏派侍衛雅爾疆阿等勦賊府城小南門大北門外並堵禦府城沿山要隘又令永慶等稽查海口並飭臺灣道永福曉諭遠近莊民概許輸誠復業卽令蹤跡莊大田共相擒獻

諭飭防海口截莊大田竄逸爲要五十三年正月奏莊大田藏匿南子坑該處係鳳山縣屬現派丁朝雄相機前進開通鳳山道路設法擒拏

上責其敷衍陳奏傳旨嚴飭又

諭曰前因常青初至郡城調度一切尙爲妥協且伊年老尙能親自帶兵打仗是以賞戴雙眼花翎以示獎勵今半載以來株守郡城毫無出力念其尙無大過業經補用福州將軍伊自當照將軍職分戴用單眼花翎時福康安劾柴大紀貪劣狀諭曰常青在閩年久擢用總督亦有年餘柴大紀平日飭法侵